

## **Kalaallit aalisariutaataanni inuttalersuineq pillugu Namminersornerullutik Oqartussat nalunaarutaat nr. 35, 28. oktober 1993-imeersoq Atuussimasoq (Historisk)**

Inuussutissarsiutigalugu aalisarneq pillugu Inatsisartut inatsisaanni nr. 17-imi ulloq 22. oktober 1990-imeersumi §§7, 18 aamma 28 malillugit aalajangersarneqarpoq:

### *Atuuffii*

§ 1. Nalunaarut atuuppoq angallatit 50 BRT/90 BT-inik taakkuninngaluunniit anginerusut Kalaallit Nunaanni nalunaarsorsimasut atorlugit inuussutissarsiutigalugu aalisarnermut.

### *Inuttalersuinermit maleruagassat*

§ 2. Ikinnerpaamik aqumiut 60%-ii aamma angallammi inuttat allat tamarmik tassaassapput inuit,  
1) Kalaallit Nunaanni inuit nalunaarsorsimaffianni najugalittut nalunaarsorneqarsimasut aamma Kalaallit Nunaanni inuit nalunaarsorsimaffianni ukiut qaangiuttut marluk naallugit najugalittut nalunaarsorneqarsimasut, aamma  
2) Kalaallit Nunaannut tamakkiisumik akileraartartussaataitaasut aamma qaammatisiutit malillugit ukiut qaangiuttut marluk naallugit Kalaallit Nunaannut tamakkiisumik akileraartartussaataitaasimasut, tamatumani ilinniarnissaq siunertaralugu Kalaallit Nunaata avataaniikkallarsimanerit naatsorsuutigineqassanatik.

Imm. 2. Tamatumunnga atatillugu inuttat imatut inissisimasut aqumiutut paasineqassapput:

- 1) Umiarsuup naalagaa,
- 2) aquttut,
- 3) igasoq/hovmester,
- 4) trawlbas aamma
- 5) fabrikkimi pisortaq aamma formandi.

Imm. 3. Maskinchefi maskinmesterillu kiisalu teknikerit, fabrikkimi atortunik aserfallatsaaliinermik taamaallaat suliaqartut, imm. 1-imi maleruagassanut ilaatinneqanngillat.

Imm. 4. Kalaallit Nunaata avataani ilinniarniarluni najugaqarsimanernut uppersaait inuttanngortitsinermit atatillugu KANUAANA-mut (Kalaallit Nunaanni Aalisarsinnaanermut Akuersissutit Nakkutilliisoqarfik, Box 501, 3900 Nuuk, fax 2 32 35) nassiunneqassapput.

Imm. 5. Immikkut pissutissaqartillugu Naalakkersuisut - nunami suliffissuit pilersorneqarnerisa isumannaarneqarnissaat aammalu angallatini imartani Kalaallit Nunaata aalisarnikkut oqartussaaffigisaasa avataanni aalisartuni inuttalersuineq aammalu aalisariaatsinut nutaanut inuttanik ilinniartitsinisaq eqqarsaatigalugit imm. 1-imi maleruagassat saneqqunneqarnissaannik nalunaaruteqarsinnaapput.

### *Nakkutilliineq*

§ 3. Inummik aalisarnerup nalaani umiarsuarmi sulisussamik inuttangortitsisoqartillugu inuttangortitsisup akisussaaffigaa inuttangortup Kalaallit Nunaannut attuumassuteqarnissamik aalisarnermut inatsimmi aalajangersakkanik naammassinnissimanissaa.

Imm. 2. Uppernarsaatitut atsiorfissaq ilanngunneqartoq inuttangortup Kalaallit Nunaannut attuumassuteqarneranik uppersarsaatitut atsiorfigalugu atorineqarsinnaavoq.

Imm. 3. Inuttangortup aqqa, atorfiata taaguutaa, CPR-normua aamma kommuni najugaqarfia aammalu inuttangortup § 2-mi imm. 1-imi titarnertaani 1)-imi aamma 2)-mi piumasaqaatit naammassismanerai aalisariarnermi inuttalersuinermit allattaavimmi inuttangortitsinermit atatillugu kingusinnerpaamillu umiarsuup aalisarfissaminukarluni aallarnerani allatorneqassapput.

Imm. 4. Inuttalersuinermit allattaavik ilanngunneqartoq, KANUAANA-mut, Box 501, 3900 Nuuk imaluunniit faxikkut 2 32 35-kkut saaffiginnilluni pineqarsinnaasoq, atorineqarsinnaavoq.

Imm. 5. Inuttalersuinermit allattaavik pisariaqassappallu uppersarsaatitut atsiorfissaq umiarsuup allattaaviinut ilanngullugit KANUAANA-mut nassiuqqassapput.

### *Pineqaatissiisutaasinnaasut*

§ 4. § 2-mi imm. 1-imi aamma § 3-mik unioqqutitsinerit akiliisitsinermit kinguneqarsinnaapput.

Imm. 2. Aktieselskabi, anpartsselskabi, andelselskabi imaluunniit umiarsuaatileqatigiiffik unioqqutitsisimappat ingerlatseqatigiiffik pineqartoq taannaatillugu akiliisussanngortinneqarsinnaavoq.

Imm. 3. Tamakkuninnga suliassat inuussutissarsiutigalugu aalisarneq pillugu Inatsisartut inatsisaanni aalajangersakkat malillugit suliarineqassapput.

### *Atuutilerfia*

§ 5. Nalunaarut atuutilerpoq ulloq 1. december 1993.

Imm. 2. Atuutilersitsinikkut uku atorunnaarput; nalunaarut nr. 27 27. december 1988-imeersoq, § 5 nalunaarummi nr. 40-mi 30. december 1991-imeersumiittoq, § 3 nalunaarummi nr. 39-mi 30. december 1991-imeersumiittoq, § 10 nalunaarummi nr. 6-imi 8. april 1991-imeersumiittoq, § 2-mi imm. 6 aamma 7 nalunaarummi nr. 25-mi 27. december 1988-imeersumiittut aamma § 2-mi imm. 5 nalunaarummi nr. 3-mi 3. januar 1985-imeersumiittoq.

*Namminersornerullutik Oqartussat, ulloq 28. oktober 1993.*

Hans Iversen

/

Henrik Leth

---

Ilanngussaq 1

Ilanngussaq 2